



PERPUSTAKAAN MASJID

PEMANGKIN KETAMADUNAN UMMAH

Prosiding Persidangan Perpustakaan Masjid
Peringkat Kebangsaan 2012



Penyunting

Dr. Lokman bin Ab. Rahman (JAKIM)

Dr. Wan Ali bin Wan Mamat (UIAM)

Diterbitkan Oleh
JABATAN KEMAJUAN ISLAM MALAYSIA
BAHAGIAN KEMAJUAN ISLAM
www.islam.gov.my

Cetakan Pertama 2013
Hak Cipta Terpelihara

Hak Cipta Terpelihara tidak dibenarkan mengeluar ulang mana-mana bahagian artikel, ilustrasi, dan isi kandungan buku ini dalam apa juga bentuk dan dengan cara apa jua sama ada secara elektronik, fotokopi, mekanik, rakaman, atau cara lain sebelum mendapat izin bertulis daripada penerbit Ketua Pengarah, Jabatan Kemajuan Islam Malaysia, Pusat Pentadbiran Kerajaan Persekutuan, 62519 Putrajaya.

Reka bentuk oleh:

Black & Brown Asssociates
No. 9-4, Leval 4,
Pusat Dagangan UMNO Shah Alam,
Persiaran Damai, Sek. 11,
40000 Shah Alam,
Selangor Darul Ehsan, MALAYSIA
Tel: (6)03-5513 2250
Faks: (6)03-5513 2251
Email: mybbrown@gmail.com

KANDUNGAN

● KATA PENGANTAR	1
- Oleh : Dato' Haji Othman bin Mustapha Ketua Pengarah JAKIM	
● UCAPAN PERASMIAN	4
- Oleh : Y.B Senator Mejah Jeneral Dato' Seri Jamil Khir bin Haji Baharom (B) Menteri di Jabatan Perdana Menteri	
● UCAPAN ALU-ALUAN	10
- Oleh : Prof. Dato' Sri Dr. Zaleha binti Kamaruddin Rektor UIAM	
● RESOLUSI	13
● PEMBENTANG KERTAS KERJA 1	15
- Peranan Perpustakaan Masjid Dalam Pembangunan dan Kemajuan Umat di Zaman Globalisasi	
- Oleh : Sheikh Muhammad 'Uthman El-Muhammady ISTAC IIUM	
● PEMBENTANG KERTAS KERJA 2	31
- Peranan Perpustakaan Masjid di Malaysia Dalam Pembangunan Ummah	
- Oleh : Dr. Nordin bin Ahmad JAKIM	
● PEMBENTANG KERTAS KERJA 3	47
- Pembangunan Sistem Perpustakaan di Perpustakaan Masjid : Satu Cadangan	
- Oleh : Dato' Raslin bin Abu Bakar Perpustakaan Negara Malaysia	

- **PEMBENTANG KERTAS KERJA 4 59**
 - Peranan Perpustakaan Masjid
 - Satu Kajian Ringkas di Masjid Putra
 - Oleh : Dr. Lokman bin Ab. Rahman
 - JAKIM
- **PEMBENTANG KERTAS KERJA 5 69**
 - Mengimarahkan Perpustakaan Masjid
 - Oleh : Nor Azzah binti Momin
 - Universiti Sains Islam Malaysia
- **PEMBENTANG KERTAS KERJA 6 83**
 - Perpustakaan Islam di Malaysia Masa Kini
 - Oleh : Balqis binti Suja'
 - Universiti Islam Antarabangsa Malaysia
- **PEMBENTANG KERTAS KERJA 7 99**
 - Pengembangan Perpustakaan Masjid dan Pondok Pesantren di Indonesia
 - Oleh : Muhammad Kailani Eryono & Fuady Munir
 - Pusat Perpustakaan Islam Indonesia

PEMBENTANG KERTAS KERJA 6

PERPUSTAKAAN ISLAM DI MALAYSIA MASA KINI

Balqis binti Suja¹

Universiti Islam Antarabangsa Malaysia

PENGENALAN

Dalam peradaban Islam, perpustakaan merupakan simbol kemajuan-bukan saja sebagai institusi tempat pengumpulan, pemeliharaan, penciptaan, penjanaan dan penyebaran ilmu dan sumber-sumbernya tetapi juga institusi yang melahirkan ilmuwan dan cendikiawan. Pembinaan perpustakaan Islam dilatari oleh keperluan menjaga dengan baik koleksi mushaf al-Qur'an dan bahan-bahan yang terbit dari pembelajaran dan pemahaman al-Qur'an dan Hadith, serta amalan mewaqafkan dan menghadiahkan salinan bahan-bahan tersebut kepada masjid. Islam menuntut proses pembelajaran secara serius dan berterusan, dan secara semulajadi budaya ini membenihkan penghargaan terhadap sumber ilmu, termasuk buku dan perpustakaan. Walaupun sudah terdapat perpustakaan sebelum era Islam, warisan dan tradisi ilmu dari tamadun kuno Yunani dan Parsi terpelihara dan sampai kepada peradaban barat melalui landasan peradaban Islam.

Perpustakaan Islam bermula dari masjid sebagai *maktabah masahif atau khaza'in masahif*¹. Kedua-dua institusi ini merupakan institusi untuk kebajikan umum umat Islam bagi aktiviti menjalankan ibadah dan seruan menuntut ilmu. Perpustakaan Islam lahir dari terkumpulnya koleksi bahan ilmu di masjid dan seterusnya berkembang menjadi perpustakaan yang bermula pada zaman dinasti Umayyah (661-750). Perpustakaan masjid kebanyakannya tumbuh seiring dengan madrasah. Sekolah yang pertama lahir di masjid pada tahun 653 M di Madinah.

Masjid-masjid tertua yang mempunyai perpustakaan antaranya: Masjid 'Amr ibn al-'Asr di Kaherah (diasaskan sekitar 641); Perpustakaan Sufiya

¹ Siba'i, Muhammad Makki (1987). Mosque Libraries: An Historical Study. London: Mansell.

Masjid-masjid tertua yang mempunyai perpustakaan antaranya: Masjid ‘Amr ibn al-‘Asr di Kaherah (diasaskan sekitar 641); Perpustakaan Sufiya di Masjid Besar Umayyah di Aleppo (masjid utama didirikan sekitar 661-749); Masjid Qayrawan di Tunisia (dibina antara tahun 670-680); Masjid Zaytuna di Tunisia (diasaskan pada tahun 699); Masjid al-Aqsa (didirikan tahun 705); Masjid Umayyah di Damascus (didirikan oleh Khalifah al-Walid ibn Abd al-Malik pada tahun 714); dan Masjid Besar Cordova (diasaskan pada 786). Fenomena pembinaan perpustakaan berlaku dengan pesat pada zaman khalifah Abbasiyah (750-1258). Ada diantara perpustakaan besar dan masyhur pada zaman itu berkembang menjadi universiti seperti Universiti Zaytuna dan Universiti al-Azhar.

PERPUSTAKAAN ISLAM DAN CIRI-CIRINYA

Apakah yang dimaksudkan dengan perpustakaan Islam? *International Encyclopedia of Information and Library Science*² menyatakan:

“What then is an ‘Islamic library’? It is a library that focuses on Islamic-or Muslim-sources of information, irrespective of geographic concentration (Muslim majority/minority country), language focus or discipline orientation. Such libraries by their very nature were, from the very beginning, more public than private and, indeed, freely open to the public.”

Secara umumnya, perpustakaan Islam kebanyakannya wujud di institusi dan organisasi Islam. Perkhidmatan perpustakaan Islam memfokuskan kepada bahan-bahan pengetahuan Islam dan keperluan maklumat orang-orang Islam. Dari segi orientasi perkhidmatan, seorang cendikiawan LIS (Library and Information Science) menekankan bahawa perpustakaan Islam hendaklah wujud sebagai perpustakaan yang mempunyai koleksi yang dapat memantulkan dan menggarap keseluruhan Islam dan maknanya - iaitu refleksi Islam. Professor Smith (1965) menulis:

² Islamic Libraries (2003). *International Encyclopedia of Information and Library Science* (2nd ed.). London: Routledge. pp. 330.

“Accordingly, an Islamic library should contain, and its indexing system should guide the student to, not only books “about Islam” but books that start, as it were, from an Islamic stance and look out on others things; books about almost anything, in so far as they treat their subject Islamically (ms. 290).”

Berdasarkan catatan dari penulisan mengenai perpustakaan Islam, bolehlah disimpulkan bahawa ciri-ciri perpustakaan Islam antaranya adalah:

- a) Bahan berbahasa Arab merupakan komponen utama koleksi kerana dominasi Bahasa Arab sebagai bahasa karya klasik Islam.
- b) Berfungsi sebagai perpustakaan rujukan yang berkualiti (iaitu dilengkapi bahan turath yang standard).
- c) Sistem pengindeksan berorientasi Islam, iaitu yang memandu kepada bahan-bahan berkaitan Islam, menjelak galur pandang Islam dan penonjolan sudut pandang Islam.
- d) Pembinaan koleksi Islam yang kaya, iaitu fokus kepada subjek Islam serta penyajian kepada bahan-bahan yang asli, berkualiti dan berkredibel, di samping pengumpulan bahan pelbagai bidang perkara dan genre serta bahan dari luar Negara.
- e) Bersifat perpustakaan awam berbanding khas.
- f) Dikawal selia dan diuruskan oleh golongan sarjana atau cendikiawan.
- g) Diwujudkan bagi komuniti Islam dan/atau pengajian Islam.
- h) Mempunyai karektor akademik.

Kata nama am *“khizanah”* telah digunakan sejak zaman Khalifah ‘Umar ‘Abd al-‘Aziz (682-720) untuk merujuk ruang yang dikhaskan sebagai perpustakaan. Apa yang menarik ialah penggunaan perkataan *“hikmah”* (wisdom) dan *“khizanah”* (treasure) yang meluas, kebetulan dengan konsep

moden hirarki kepintaran DIKW (Data, Information, Knowledge and Wisdom). Kata penamaan “*maktabah*” dan “*dar al-kutub*” lebih banyak mula dipakai pada zaman akhir kegemilangan Islam. Bagaimanapun, “*dar al-kutub*” telah digunakan di Baghdad pada tahun 991.

Di dalam bangunan perpustakaan, terdapat bilik-bilik (*khaza'in*) bagi menyimpan bahan mengikut kategori tertentu, kemudian terdapat rak simpanan (*rufuf*) yang bersenggat dan mempunyai pintu (*hadjiz*) bagi susunan bahan mengikut pengelasan atau jenis. Ada juga rak simpanan terbuka. Naskhah al-Qur'an akan diletakkan di susunan yang paling tinggi. Koleksi perpustakaan yang diperolehi melalui pembelian, hadiah dan penyalinan disusun dalam katalog (*fihrist*) manakala bahan wakaf selalunya mempunyai waqfiyah (dokumen wakaf dan keterangan bahan) yang juga digunakan sebagai katalog. Di samping itu daftar bahan yang terdapat dalam sesuatu bahagian rak diletakkan pada pintu atau permukaan rak tersebut.

Bukan saja rak buku dan keperinciannya, perpustakaan Islam juga dilengkapi bilik dan ruang bacaan, bengkel untuk menyalin bahan (termasuk pemeliharaan dan penjilidan), dewan khas untuk perbincangan, dewan bagi menikmati muzik, malah termasuk kemudahan bagi musafir pencari ilmu - tempat tidur, makan dan mandi. Kegunaan alat tulis bagi pengguna perpustakaan juga disediakan. Pengurusan perpustakaan dijalankan oleh seorang pengarah (sahib), pustakawan (*khazin*), tukang salin (*nasikh*) dan pelayan (*farrash*).

KATEGORI PERPUSTAKAAN ISLAM

Perpustakaan Islam bersifat menekankan penggunaan awam. Pada zaman kegemilangan Islam, ada tiga jenis perpustakaan:

1. Perpustakaan awam - Perpustakaan awam terdapat atau dibina bangunan tambahan di masjid atau madrasah, atau bangunan tetap yang dikhaskan untuk perpustakaan awam.
2. Perpustakaan khusus-umum (*mutakhassisah*) - Perpustakaan separa-

awam ini merupakan perpustakaan yang dibina oleh pemerintah dengan fokus dan kekuatan koleksi mengikut bidang yang diminati oleh pemerintah zaman tersebut. Tidak seperti perpustakaan awam yang dibuka kepada orang ramai, perpustakaan ini dibuka kepada golongan tertentu sahaja.

3. Perpustakaan khas (*khassah*) - Perpustakaan persendirian selalunya terdapat di istana atau rumah golongan ilmuwan (*ulama'*), hakim (*fujaha'*), sasterawan (*udaba'*) dan orang-orang kaya (*aghniya'*). Ada yang dibuka kepada orang ramai atau didirikan bagi kegunaan awam, tetapi selalunya perpustakaan ini dihadkan kepada kegunaan persendirian, ahli keluarga, lingkungan dan kenalan. Pada masa yang sama, sebahagian perpustakaan ini merupakan perpustakaan peringatan (*monumental*).

TUJUAN KLASIK PERPUSTAKAAN ISLAM

Sifat sesebuah perpustakaan Islam ialah ia bermula dengan koleksi, iaitu hasil ekspresi lantaran dari minat, penghargaan dan kecintaan terhadap buku. Koleksinya wujud terlebih dahulu, barulah diikuti dengan perpustakaan. Ia tidak lahir dengan adanya bangunan perpustakaan atau cetusan idea untuk membina sesuatu perpustakaan bagi memudahkan pemilikan dan pengumpulan buku. Boleh dikatakan fenomena ini seiring dengan katanama latin '*libri*' yang bermaksud buku. Secara tradisi, perpustakaan bermaksud 'kumpulan buku'. Beberapa lama kemudian, muncullah perkataan 'maktabah' yang membawa maksud 'tempat simpanan buku'.

Tinjauan penulisan tentang perpustakaan Islam menunjukkan perpustakaan mempunyai tujuan yang lebih tinggi dari fungsi yang biasa - bukan sekadar pembinaan koleksi, kelolaan susun aturan bahan maklumat, dan penyampaian maklumat. Boleh disimpulkan, tujuan klasik perpustakaan Islam adalah:

- a) Pemeliharaan bahan.
- b) Pengumpulan bahan dan mengumpul semak (*collection, collation and correction*)

- c) Pengeluaran dan penggandaan bahan ilmu.
- d) Pengaliran dan penyebaran ilmu.
- e) Penciptaan dan pencarian ilmu.
- f) Penterjemahan.
- g) Pengurusan ilmu dan pengelolaan koleksi.
- h) Pembinaan landasan peradaban.

Pernyataan di atas menggambarkan penggunaan perpustakaan yang aktif sebagai institusi pembinaan ilmu. Perpustakaan bukan saja tempat berlakunya aktiviti pembacaan dan penulisan, malah kemudahan perbincangan dan perbahasan disediakan sebagai pengiktirafan bahawa pengaliran ilmu secara lisan penting dalam pencapaian hikmah. Perpustakaan berperanan seolah-olah sebuah universiti, makmal, atau kilang kepustakaan Islam.

FAKTOR KEMAJUAN PERPUSTAKAAN ISLAM PADA MASA LALU

Dengan catatan tentang banyaknya perpustakaan Islam, sudah tentu ia senario yang terhasil daripada pandangan yang jauh dan motivasi yang tinggi. Jika diringkaskan, ada persekitaran dalaman dan luaran yang mendorong kemajuan perpustakaan Islam.

Faktor-faktor “*intrinsic*” yang secara tidak langsung menjurus kepada kebergantungan terhadap perpustakaan:

- a) Menuntut ilmu sebagai tanggungjawab agama.
- b) Komitmen memahami agama dan keterlibatan dalam mengembangkan ilmu.
- c) Sentiasa dalam keadaan menuntut ilmu dan belajar.
- d) Sumbangan kepada perpustakaan sebagai ‘saham pendidikan’.
- e) Sikap memuliakan ilmu dan sumbernya - iaitu buku dan orang berilmu.
- f) Pernyataan perpustakaan sebagai punca pancuran warisan Islam.

Faktor-faktor “*ektrinsik*” pula menyokong kewujudan perpustakaan dan membolehkan perpustakaan membesar dan bertahan melalui:

- a) Naungan dan usaha pemerintah beserta bantuan kewangan.
- b) Peruntukan yang besar untuk perpustakaan awam.
- c) Perhatian dan kerjasama pihak-pihak yang terlibat dalam pengeluaran buku dan salinannya.
- d) Kesedaran terhadap aspek pemeliharaan dan pengumpulan buku secara meluas di peringkat individu, manakala masjid pula mempunyai infrastruktur pemeliharaan.
- e) Dana penghasilan karya.
- f) Minat terhadap buku asing terutama di kalangan cendikiawan dan golongan berharta.
- g) Buku sebagai sesuatu yang berharga - sama ada sebagai harta, sumber kebanggaan dan bahan bernilai dagang.
- h) Tradisi mawaqif, termasuk waqaf buku oleh sarjana kepada masjid tempatan dan sumbangan buku oleh khalifah dan pemerintah.
- i) Persaingan bagi membina perpustakaan yang hebat.
- j) Agensi pembentuk pandangan awam.
- k) Lambang kemajuan negara - sengaja dibina di kota-kota dan sempadan negeri.

PERADABAN ISLAM DAN KEPUSTAKAWANAN

Sekali pun perpustakaan merupakan suatu elemen awal peradaban Islam, penulisan tentang perpustakaan lebih banyak menonjolkan aspek sejarah dan budaya. Perpustakaan dan kepustakawan sememangnya dua topik yang tidak boleh dipisahkan. Bagaimanapun aspek kepustakawan perlu ditekuni dengan lebih wajar bagi meluaskan perbincangan antaranya berkaitan akses fizikal dan intelektual, proses dan amalan kerja serta Sains Perpustakaan sebagai satu disiplin ilmu. Peradaban Islam memperkenalkan beberapa konsep dalam kepustakawan, antaranya:

- a) Perpustakaan sebagai tempat umum, bermula dengan perpustakaan di masjid-masjid pada abad ke 7. Perpustakaan masjid merupakan segmen yang penting dalam perpustakaan Islam.

- b) Perpustakaan awam dengan pembukaan sebuah akademi di Damsyik yang dikenali sebagai Bayt al-hikmah pada tahun 656 oleh Mu'awiyah bin Abu Sufyan (603-680). Pada masa ini, perpustakaan dirujuk sebagai *Khizanah*.
- c) Seterusnya, Bayt al-hikmah diwarisi oleh cucu Mu'awiyah, Khalid bin Yazid dan memulakan konsep perpustakaan khusus dengan tumpuan koleksi berkaitan kimia dan perubatan pada abad ke 7.
- d) Akses umum dan peminjaman buku, dibuktikan dengan klaus berkenaan akses dan peminjaman buku wakaf sebagai satu ciri penting dalam "waqfiyah" (dokumen wakaf). Di Barat, kemudahan ini bermula dengan perpustakaan di Cordoba pada abad ke 8.
- e) Pemeliharaan dan penyebaran ilmu melalui penterjemahan ke dalam bahasa Arab.
- f) Pengkelasan ilmu pengetahuan, bermula dengan al-Farabi (870-950).
- g) Perpustakaan bergerak, juga oleh Khalid bin Yazid.
- h) Perpustakaan hospital, apabila perpustakaan digabungkan atau dibina di *bimaristan* pada abad 9-12.
- i) Pemilikan koleksi universal melalui agen pencari buku asing.
- j) Kecintaan terhadap buku termasuk pembinaan koleksi peribadi, seperti gambaran yang diberi oleh al-Jahiz (776-868).
- k) Pengumpulan dan perolehan bahan.
- l) Seni buku, termasuk penjilidan, kaligrafi, perhiasan dan ilustrasi.
- m) Kolasi, termasuk pembetulan dan asal usal-usul buku.

- n) Katalog (dan susunan rak koleksi), bermula dalam bentuk codex sebagai daftar koleksi sesebuah perpustakaan. Pengelompokan karya, selalunya berdasarkan asal-usul dan pengarang asal (collocation), termasuk pengesanan jalur penyampai (line of transmission) sangat diutamakan. Sejarah katalog di Barat digambarkan dengan katalog bercetak yang bermula abad ke 15.
- o) Tradisi penyusunan bibliografi dimulakan dengan al-Fihrist oleh Ibn Nadim pada tahun 987.
- p) Kawalan bibliografi melalui fenomena karya kamus biografi dan bio-bibliografi (biasa dipanggil *kutub al-tabaqat* atau *kutub al-tarajim*) yang lahir sejak awal abad ke 3H / 9M. Dengan banyaknya karya yang cuba dikesan dan direkod secara komprehensif, struktur penyusunan entri merupakan penerokaan yang mencabar.
- q) Industri buku dan pemerdagangan buku sejak abad ke 10 dengan ramainya wakil penjual, penerbit (melalui penggajian penyalin), pencari bahan autograf, pengumpul buku serta bahan nadir. Kefahaman tentang nilai buku (iaitu manuskrip) mendorong kepada kejadian kehilangan bahan dan ‘pinjaman jangka panjang tanpa tarikh pulang’ yang disengajakan.
- r) Kelapangan akses dan mesra pengguna - pentadbir perpustakaan sangat menyokong penggunaan perpustakaan sehingga pada awal abad ke 10, beberapa perpustakaan umum dan khas ada menyediakan kemudahan tempat tinggal, makan minum, alat tulis dan bantuan kewangan kepada pengunjung dan pengguna perpustakaan.
- s) Profession pustakawan, mungkin dimulai oleh Sahl ibn Harun (d. 830) sebagai pengarah perpustakaan di Bayt al-Hikmah.

PERSPEKTIF TENTANG KEPUSTAKAWANAN ISLAM

Kepustakawan Islam (*Islamic librarianship*) bukanlah satu bidang yang sedia dikenali sepetimana kepustakawan undang-undang, perubatan, muzik dan lain-lain. Dalam pengajian sains perpustakaan, kepustakawan Islam digolongkan dalam kepustakawan kawasan (*area librarianship*). Hal ini jelas dilihat apabila istilah yang paling kerap digunakan bagi mewakili bidang ini ialah '*Middle Eastern librarianship*'. Selain itu ia juga digelar North African, Near Eastern, atau Arab librarianship. Jarang sekali '*Muslim librarianship*' ditemui. Jika bidang ini dirangkumkan dengan kategori yang lebih umum, ia digolongkan sebagai *Oriental, theological, religious, specialized, comparative* atau *international librarianship*.

Perpustakaan Islam sudah lama wujud, malah di Barat ia ditandai dengan Perpustakaan Masjid Besar Cordoba (diasaskan pada 786) dan Perpustakaan Diraja Bani Umayyah, juga di Cordoba (diasaskan oleh al-Hakam II yang memerintah pada 961-976). Malah, bidang pengajian Arab dan Islam juga sudah ditawarkan sejak 1917 di Britain. Adakah kepustakawan Islam satu profession yang baru jika dibandingkan misalnya dengan kepustakawan undang-undang yang sudah dimulai dengan pendidikan formal pada 1913 di New York State Library School?

Jika dilihat dari kemunculan istilah, boleh dikatakan ia agak baru berdasarkan penggunaan '*Islamic librarianship*' yang diperkenalkan pada 1965 oleh Professor Wilfred Cantwell Smith di dalam artikelnya "The Islamic Near East: intellectual role of librarianship", diterbitkan dalam *Library Quarterly*. Kepustakawan Islam sebenarnya mengandungi bukan saja sains perpustakaan tetapi juga kepelbagaiannya disiplin ilmu dan tidak merujuk kepada bahagian geografi tertentu sahaja. Jika "*Islamic librarianship*" pernah digunakan, mungkin istilah "*Islamic sciences librarianship*" juga boleh dipertimbangkan kerana memberi dimensi yang lebih luas jika dibandingkan dengan "*Islamic Information*". Lakaran istilah adalah penting bagi memberi makna dan skop sesuatu bidang pengajian.

PERPUSTAKAAN ISLAM DI LUAR NEGARA ARAB

Sebagai lokasi pemula agama Islam, perpustakaan Islam terdapat dengan banyaknya di Negara Arab dan negara yang pernah menjadi empayar Islam. Perpustakaan Islam masih terus didirikan di seluruh dunia walaupun di negara-negara yang mempunyai penduduk Islam sebagai golongan minoriti seperti:

- a) National Islamic Library, Australia.
- b) Cordoba House Islamic Studies Library, Ontario, Canada.
- c) Al-Ma'rifa Islamic Library, Auckland.
- d) Ar-Raudhah Islamic Library, Singapore.
- e) National Islamic Library, Nigeria.
- f) Islamic Library of AECI (Agencia Espanola de Cooperacion Internacional) Madrid.
- g) American Islamic Library, Plainfield USA.
- h) Public Islamic Library, Centre for Islamic Guidance, Kattankudy, Sri Lanka.
- i) Instituto de Estudios Islamicos Library, Peru.

Koleksi Islam termasuk manuskrip dan bahan nadir juga merupakan koleksi khusus yang banyak tersimpan di negara-negara barat terutamanya di Amerika Syarikat, Great Britain, Perancis, German dan Netherland. Terdapat senarai yang panjang perpustakaan-perpustakaan yang mempunyai koleksi manuskrip dan bahan nadir Islam, iaitu bahan yang mempunyai nilai penyelidikan yang tinggi. Di Asia, perpustakaan Islam yang penting termasuklah:

- a) Perpustakaan Sulaymaniyah di Istanbul.
- b) Perpustakaan Maulana Azad, Aligarh Muslim University, Uttar Pradesh.
- c) Perpustakaan ISTAC (International Institute of Islamic Thought and Civilisation), di Universiti Islam Antarabangsa Malaysia.
- d) Islamic Research Institute Library, Pakistan.
- e) Perpustakaan IRCICA (Research Centre for Islamic History, Art and Culture), Istanbul.

- f) Perpustakaan Akademi Islam, Universiti Malaya.
- g) Perpustakaan Universitas Syarif Hidayatullah State Islamic University.

STATUS PERPUSTAKAAN ISLAM DI MALAYSIA

Posisi Islam sebagai agama rasmi Malaysia termaktub dalam perlembagaan dan hal ini ditunjukkan dengan syiar terutamanya dengan kemudahan masjid, pendidikan Islam dan struktur pentadbiran agama. Di samping fakta-fakta fizikal, statistik asas bagi meneroka status kepustakawan Islam seperti kadar celik huruf Arab, penghasilan kepustakaan Islam, tahap pembacaan bahan-bahan Islam, dan akses kepada perpustakaan Islam perlu diketengahkan.

Malaysia adalah antara negara Islam yang mempunyai perpustakaan negara, iaitu didirikan pada tahun 1966, sebagai salah satu pencapaian Persatuan Pustakawan Malaysia yang wujud sejak tahun 1955. Di dalam mesyuarat ke 21 Persidangan Majlis Kebangsaan Bagi Hal Ehwal Islam Malaysia pada 24 Ogos 1993, dibuat ketetapan bahawa perpustakaan masjid hendaklah didirikan di Malaysia. Pada tahun berikutnya, Jawatankuasa Teknikal Mengadakan Perpustakaan Di Masjid-masjid Seluruh Negara telah dibentuk. Pada tahun 1997, projek perpustakaan masjid kemudiannya diambil alih oleh Jawatankuasa Koordinasi Pembentukan Perpustakaan Masjid.

Terdapat beberapa perkara bagi menggambarkan status dan profail perpustakaan Islam di Malaysia, antaranya:

- a) Majoriti perpustakaan Islam di Malaysia merupakan perpustakaan masjid tetapi sedikit sekali terdapat perpustakaan di masjid-masjid lama. Hal ini mungkin disebabkan masjid-masjid utama di sesuatu kawasan berkembar dengan institusi pondok yang sedia mempunyai koleksi bagi kegunaan pelajar.

Masjid baru selalunya dilengkapi dengan bilik atau ruang perpustakaan tetapi kebiasaannya ruang tersebut lebih layak dianggap sebagai sudut bacaan sahaja. Sesetengah ruang perpustakaan ini agak terbiar dan

dan tersembunyi, berlainan dengan tradisi klasik perpustakaan masjid di mana perpustakaan berada di tempat yang menonjol supaya sesiapa yang masuk ke kawasan masjid dapat melihat keberadaan perpustakaan dengan jelas, di samping kemudahan akses dari ruang utama masjid bagi kemudahan imam dan pegawai masjid.

Dengan keadaan perpustakaan masjid di Malaysia, pembinaan koleksi yang terancang dan edaran melalui pinjaman adalah terbatas. Ada negeri yang aktif membangunkan perpustakaan masjid seperti negeri Kedah dan Melaka. Di Selangor, masjid juga dibangunkan sebagai pusat ilmu dengan peruntukan koleksi perpustakaan dan kemudahan WiFi.

- b) Kekurangan perpustakaan masjid yang baik secara tidak langsung ditampung oleh perpustakaan desa masjid. Terdapat perpustakaan desa yang dibina oleh Perpustakaan Negara Malaysia dan Perbadanan Perpustakaan Awam Negeri yang lokasinya berada di kawasan masjid.
- c) Istilah '*kutubkhanah*' bagi merujuk perpustakaan masih digunakan dan difahami oleh generasi pertengahan umur. '*Kutubkhanah*' dikatakan berasal dari bahasa Parsi tetapi di Iran ia dirujuk sebagai '*Kitabkhanah*', sebaliknya di Turki sebagai '*Kutubkhanah*'.
- d) Perpustakaan Awam Islam Malaysia mula beroperasi pada tahun 1985 apabila Kompleks Pusat Islam siap dibina. Penubuhan perpustakaan ini merupakan anjakan penting dalam kepustakawan Islam Malaysia. Dengan koleksi yang melebihi 100,000 naskhah, ia tergolong sebagai perpustakaan saiz sederhana.

Berdasarkan 210 perpustakaan Islam yang telah dikenalpasti³, perpustakaan tersebut dikategorikan kepada enam bahagian, iaitu:

- i. Universiti Awam
- ii. Universiti dan kolej swasta

³ Balqis Suja' (2012). Islamic Librarianship and Malaysian Islamic Libraries. Petaling Jaya: Read Resources.

- iii. Perpustakaan nasional, awam (termasuk 95 perpustakaan masjid) dan negeri
 - iv. Jabatan kerajaan
 - v. Badan berkanun dan institusi persendirian
 - vi. Persatuan dan pertubuhan
- f) Terdapat jurang yang agak ketara antara bilangan perpustakaan Islam dan jumlah pustakawan manakala kakitangan dan staf sokongan pula tidak dilengkapi dengan program latihan pengurusan perpustakaan.

Selain di perpustakaan, koleksi bahan Islam dan maklumat berkenaan hal ehwal Islam di Malaysia banyak tersimpan sebagai maklumat pentadbiran di pejabat-pejabat pentadbiran Islam kerajaan persekutuan dan negeri. Walaupun tidak termasuk sebagai maklumat edaran terhad, bahan dan rekod yang bernilai boleh hilang atau tidak dapat dikesan jika tidak diurus dengan kaedah memudahkan akses dan penyelidikan. Tanpa program pemeliharaan, bahan-bahan koleksi warisan dan penyelidikan tidak dapat diakses bagi menggambarkan kesinambungan kemajuan Islam Malaysia.

MEMAJUKAN PERPUSTAKAAN ISLAM DI MALAYSIA

Ada berapa perpustakaan Islam di Malaysia? Bagaimakah tahap penggunaannya? Adakah peruntukan dan sokongan yang disediakan seimbang dengan bilangan perpustakaan? Persoalan asas ini memerlukan dua faktor umum yang memungkinkan kemajuan perpustakaan Islam: pendidikan dan latihan serta pembangunan infrastruktur. Ada beberapa perkara yang boleh disarankan bagi memperbaiki kesediaan untuk merangka kemajuan perpustakaan Islam di Malaysia, antaranya:

- a) Mengenal pasti kompetensi pustakawan dan tenaga kerja yang diperlukan.
- b) Mendapatkan jumlah bilangan institusi perpustakaan Islam sedia ada, dan meletak penarafan yang sesuai.
- c) Menghimpun profail koleksi Islam di Malaysia.
- d) Menyemak struktur hal ehwal urus dan gerak kerja di peringkat nasional

dan negeri agar aspek perancangan, pelaksanaan dan sokongan dapat dikenalpasti.

- e) Mengumpul maklumat mengenai inisiatif kandungan atas talian dan perpustakaan digital Islam Malaysia.
- f) Menghuraikan budaya pengumpulan koleksi peribadi di kalangan agamawan.
- g) Mengenali potensi wakaf khas perpustakaan.
- h) Menjejaki peruntukan yang berkaitan dalam Dasar Maklumat Kebangsaan.
- i) Meningkatkan kandungan kepustakawanan Islam di dalam kurikulum pendidikan sains perpustakaan.
- j) Mengujudkan jaringan profesional yang progressif di kalangan kumpulan perpustakaan Islam.
- k) Membina rangkaian kerjasama dan latihan dengan perpustakaan Islam utama luar Negara.

KESIMPULAN

Pemerintah, sarjana dan pendidik zaman empayar Islam bersaing membangunkan perpustakaan terbaik sebagai lambang kemajuan dan pembangunan serta menifestasi kebudayaan dan peradaban Islam yang tinggi. Perpustakaan Islam wajar ditonjolkan sebagai pernyataan kesebatian dan kedudukan Islam dalam peradaban Malaysia. Kalau perpustakaan silam menjadi medan mengumpulkan buku dan pengarang-pengarangnya sehingga percambahan ilmu begitu pesat, sekurang-kurangnya perpustakaan Islam hari ini boleh menjadi pengumpul buku dan dokumen yang menemukan pembaca-pembaca dan pengguna-penggunanya bagi menghasilkan masyarakat yang mencintai buku, berilmu dan bermaklumat.

Meskipun sumber ilmu dan maklumat semakin luas dengan kepesatan teknologi dan Internet, perpustakaan masih relevan sebagai sumber utama penyaji bahan-bahan ilmu dan maklumat yang terbaik, bermutu, seimbang dan terpilih. Di perpustakaan juga, pengguna boleh mengharapkan khidmat yang berstruktur terutama bagi menghubungkan pengguna dengan bahan-bahan pustaka. Untuk mengulangi kegemilangan dan keutuhan

Islam, penyertaan aktif banyak pihak serta aplikasi pertimbangan yang berasas ilmu perlu dilaksanakan. Perpustakaan Islam adalah institusi umum yang masih bertahan dan perlu dipastikan berdaya maju sebagai tunggak tradisi keilmuan dan keutuhan sosial. Memajukan perpustakaan Islam perlu dijadikan agenda pendidikan Negara bagi menyokong pencapaian negara maju.

RUJUKAN

- Balqis Suja' (2012). *Islamic librarianship and Malaysian Islamic libraries*. Petaling Jaya: Read Resources.
- Ibn Dohaish, Abdul Latif (1987). Growth and development of Islamic libraries. *Islamic Quarterly* (31), pp. 217-229.
- Islamic libraries (2003). *International Encyclopedia of Information and Library Science* (2nd ed., pp. 330-334). London: Routledge.
- Maktaba (1991). *Encyclopaedia of Islam* (Vol. 6, pp. 197-200). Leiden: E.J. Brill.
- Siba'i, Muhammad Makki (1987). Mosque libraries: an historical study. London: Mansell.
- Siba'i, Mustafa (2005). Civilization of faith: a solidarity, tolerance and equality in a nation built on shari'ah. Riyadh: International Islamic Publishing House.
- Taher, Mohamed (2006, July). Islamic Librarianship: a bibliographic survey. [Available at <http://taher.freeservers.com/islamiclibrariesbibl.htm>]